

24. november 2009

UKA09/95

ILASSUTITUT ISUMALIUTISSIISUT

**Uunga siunnersuut: Aalisarneq pillugu Inatsisartut inatsisaata
allanngortinneqarnera pillugu Inatsisartut inatsisaat.**
(Naalakkersuisut aappassaaneerqarnissaanut saqqummiussaaf)

pillugu

Aalisarnermut ataatsimiititaliap

ISUMALIUTISSIISUTAA

Inatsisartut Aalisarnermut, Piniarnermut Nunalerinermullu Ataatsimiititaliaat suliarinninnermini ukuninnga inuttaqarpoq:

Inatsisartunut ilaasortaq Hans Aronsen, siulittaasoq, Inuit Ataqatigiit
Inatsisartunut ilaasortaq Andreas Uldum, siulittaasup tullia, Demokraatit
Inatsisartunut ilaasortaq Anders Olsen, Inuit Ataqatigiit
Inatsisartunut ilaasortaq Hans Enoksen, Siumut
Inatsisartunut ilaasortaq Siverth K. Heilmann, Atassut

1. Allannguutissatut siunnersuutip ataatsimiititaliamit suliarineqarnera

Ataatsimiititaliap ataatsimiinnermini ulloq 24. november allannguutissatut siunnersuut oqaaseqafigalugu suliaraa.

2. Ataatsimiititaliap inassutaa

**Ataatsimiititaliami amerlanerussuteqartut Inuit Ataqatigiinneersut aamma
Demokratineersut allannguutissatut siunnersuut akuerineqassasoq inassutigaa.**

Ataatsimiitaliami ikinnerussuteqartup Siumumeersup allannguutissatut siunnersuut itigartitsissutigineqassasoq inassutigaa, siunnersuullu pillugu ima oqaaseqaateqarlutik:

Aalisarnermi inatsisissaq pillugu suliaq assut sinerissami aalisartut eqaarsaatigalugit Siumumiit ilungersunarluinnartutut isigalugu makkuninnga oqaaseqarfigissavarput, aammalu oqaatigissavara akerliunniannarluta akerliunnginnatta isumaqataanninnitsinnullu tunngavilersuutigut tikissavakka uku oqaaseqarfigilaariarlugit tassalu Inatsisissami allannguutissatut siunnersuutigineqartut.

Siumumiit apeqqusinngisaannarparput pisuussutit uumassusillit illersorneqarlutik siunnessami iluaqutigineqarlutik inuiannit kalaallinit iluaqutigineqarnissaat atorluarneqarnissaallu.

Aammalu inatsimmik ersarissumik tunngavissineqarluni aalisarnerup ingerlanneqarnerani paasissutissat tutsuiginartut pissarsiarisarnissaat, kiisalu pisortanut paasissutissanik tunniussisussaatanermik piumasaqarneq tuungaviatigut Siumumiit isumaqatigisinnaagaluarlugu allatut ajornartumik itigartittariaqassallugu oqaatigeerissavarput. Imaaangilaq taakku akerlerigatsigit Siumumiimmi pingaartittuarsimavarput pisuussutit uumassusillit akisussaassuseqartumik atorneqarlutillu iluaqutigineqarnissaat.

Kisianniliuna inatsisissap suliarineqarnerani pissutsit akuersaarsinnaangisagut makku pissutigalugit aalisarnermut inatsisissaq akuersaarniangukkipput.

Siumumiit suli ilungersuutigeqqinniarparput pisassanik aqutsinermi siunnersuuteqarnermilu atuisut ilisimasaasa, tassalu aalisartut piniartullu aamma siunnersuinermit atorluarneqarnissaat assut kissaatigigatsigu makku pissutigalugit.

Uumassusilinnik iluaquteqarnissaq illersorneqarsinnaasumik ingerlanneqassappat ilisimatuut kisimik siunnersuisarneri aallaavigineqassappata ernumatigaarput atuisut ilisimasaasa atorneqaratik qarsupiinneqartarnissaat.

Assersuutigalugu aanna uppersaatissaq piffissami kingullermi Qaanaami piniartut aavernut pisasseqqinneqarnissaminnut qinnuteqarnerminni ilisimasaasa soqutigineqanngivillutik siunnersuinermi atorneqaratilluunniit tusaaneqaratillu qaangiinnarneqarmata. Aammalu Tunumi piniartut nannut pillugit ilisimasaat aamma taamatorpiaq soqutigineqaratik qaangiinnarneqartarmata.

Taamaattuminguna Siumumiit ilungersuukkipput atuisut aalisartut piniartullu ilisimasaasa aamma ilanngullugit ilisimatuut siunnersuineranni atorneqartarnissaasa qularnaarlugit inatsimmut ikkunneqarnissaat, tassami taakkuupput piniartut aalisartullu pinngortitamik uummassusilinnillu aamma ullut tamaasa atuiarnermikkut ilisimasaqarnerpaajusut ilisimatuunik atorluarneqarsinnaalluartut.

Taavalu umiatsiararsortut aalisarnermut akuersissummut akilisalernissaat Siumumiit isumaqataaffiginnilluinnarparput makku pissutigalugit. Sinerissami

aalisagarniarnermi akit appariartuinnarfiini eqqunngilluinnarmat umiatsiararsortut akuersissummut akiliisalernissaat.

Aammalu ukiap ingerlanerani puisit amiinut akit apparneqarput suli inuuniarnikkut ilungersunartorsiorititsinerulersumik, aammalu piniakkanik killilersuinerup Naalackersuisuniit ingasattumik sukaterneqarnerani umiatsiararsortut akiliisinnaanerat killeqarluinnartoq suli ilungersunarnerulissaaq, naak Aalisarnermut piniarnermullu naalackersuisoq aalisarnermi inatsisissap siullermeernerani oqalukkaluartoq umiatsiararsortut 1.milliuniit qulaallugit isertitaqartarmata 1500.00 kruunninnguanik akiliigaluarunik maluginavianngikkat.

Taamatullu oqarneq Aalisarnermut naalackersuisumiit umiatsiararsortut pisoorsuunerarlugit uagut Siumumiit isumaqatiginngivipparput, nalunnginatsigu inuuniarnikkut ilaatigut ullormiit ullormut piffissap killerpiaani inuuniarsarisut allaat motoriarangamik ilaat ingerlariaqqinneq sapilersartut aningaasarsionertik killeqanngaarmat.

Taavalu angallatit sinerissami aalisagarniartut tassalu pujortuleeqqaniit qummut aamma akuersissummut akiliisalissapput tassalu saarullinnut qaleralinnut nipisanut saattusanullu aalisarniarunik taakkununga tamatigut immikkut 1500.00 kruunit akileqqaartalissapput tamannalu Siumumiit akuersaarsinnaanngilarput.

Sinerissami rejerniartut tamarmik aamma tons-imut ataatsimut 60.00 kruunimik akiliisalissapput sinerissami aalisariutit rejerniutit nutaanngilisimapput imminullu akilersinnaasumik ingerlasinnaanerak killeqartorujussuupput aserfallatsaaliinerit akisuallaarnerat pissutigalugu taamaattumik aamma ilaasa akiliisinnaanerat killeqarmat sinerissami rejerniartut pisassaminnut akiliisarnissaat Siumumiit akuersaarsinnaanngilarput.

Taavalu akiliisitsinissamik piunasaqarneq ulloq akiliiffissamik killissaqartitsivoq tassalu akuersissut akilerneqareersimassaaq kingusinnerpaamik 1.januar kikkut umiatsiararsortut akissaqassappat ukiup taamaalinerani akuersissummik pisinissaminnut ilaat akissaqassappat kisiannili ilarpassui akissaqarnavianngillat.

Aammalu rejerniartut pisassamik amerlassusiannut ukiup aallaqqaataani akilereersimassapput kisiannili aamma periarfissinneqassallutik kingusinnerpaamik 1.april akiliisinnaatitaallutik.

Sinerissami umiatsiararsortut angallatillu aalisagarniartut aammalu rejerniartut akiliissinneqassapput akuersissutinut tamannalu assigiinngisitsineruvoq akuersarneqarsinnaanngitsoq tassami avataani qaleralinniat saarullinniallu akiliutissaat 22.million kruunit Naalackersuisut peerpaat, kisiannili umiatsiararsortut sinerissami angallataatillit rejerniartullu akiliissinneqassapput tamannalu Siumumiit akuerisinnaanngilluinnarparput.

Taamatut Siumumiit oqaaseqarluta aalisarnermi inatsisissaq akerleralugu taasissaagut isumaqaratta innuttaasut avaqquitiinnarlugit inatsisissaq aalajangersarniarneqartoq.

Ataatsimiititaliami ikinnerussuteqartup Atassummeersup allannguutissatut siunnersuut itigartitsissutigineqassasq inassutigaat, siunnersuullu pillugu ima oqaaseqaateqarlutik:

Imm. 95-ip siullermeerneqarnerani Atassummit isummat oqaaseqaatillu saqqummiussagut aalajangiusimavagut. Atassut isumaqarpoq kalaallit aalisarneranni atuisut akiliuteqartinneqartarnissaat atuutilersissallugu piffissaanngitsoq. Inuussutissarsiummi arlaatigut akiliuteqartarnissaq Atassutip tunngaviatigut tapersersorsinnaavaa. Kisiannili tamanna ilimagisat misigissuserlu tunngavigalugu atuutilersinneqartariaqanngilaq. Atassut isumaqarpoq atuisut akiliuteqartarnerat inuussutissarsiortut akilisinnaassuseqarnerisa aningaasarsiornikkut peqqissaartumik sukumiisumillu misissoqqissaareerneratigut aatsaat atuutilersissinnaasariaqartoq, taamaalilluta inuussutissarsiutip aningaasarsiornera innarlissannginnatsigu, tamatumanitaq nunatta isertitaqarnissamut periarfissaqarnera.

Atassutip aammaarluni Inatsisartunut ilaasortat nunarsuarmi aningaasarsiornarlunerpaat annertuumik ajornartorsiuteqarmata erseqqissaaviginiarpai, tamannalu soorunami nunarsuarmi niuffaffimmi aalisarnermik inuussutissarsiortut akinut pissarsiaannut sunniuteqassaaq. Aalajangiisartutut tuaviupilulluta aalajangiisariaqanngilagut, inuussutissarsiuppullu pingaarnepaaq aningaasarsiornikkut ulorianartorsiortillugu. Tamatuma saniatigut Atassut isumaqarpoq umiatsiararsortut akuersissummut 1.500 kr.-nik akiliissanngitsut. Imaassinnaavoq aalisartut ilaat pissutissaqarluartumik taamatut akiliisinnaasut. Taamaattorli naliliinerput tunngavigalugu umiatsiararsortut amerlasuut kaasarfimminnit 1.500 kr.-it amoriaannaanngilaat. Taamaattumik isitsinnit isigalugu umiatsiararsorlutik aalisartut akuersissummut akiliuteqartarnissaat inuuniarnikkut tulluartaunngilaq, taamaattumillu ataatsimilluunniit tamanna tapersersorsinnaanngilarput. Taamaattumik Atassummit Inatsisartut aalisarnermik inuussutissarsiortut akiliuteqartarnissaannik allannguutissatut siunnersuummik tapersersuinnginnissaannik kaammattorusuppagut, aningaasarsiornikkummi ajornartorneq pissutigalugu tamanna tulluartaatut isiginngilarput, kiisalu aalisarnermik inuussutissarsiortut taamatut aningaasatigut immikkut nammatassinneqarnerisigut taamatut artukiinermi nammataqarsinnaaneritut misissueqqissaarnerup amigaataanera uparuarusullugu.

Taama oqaaseqarluni siunnersuummillu siuliani allassimasunut paasinninnerit tunngavigalugit Inatsisartut Aalisarnermut, Piniarnermut Nunalerinermullu Ataatsimiititaliaata siunnersuut Inatsisartunut aappasaaniigassanngortippaa.

Siulittaasoq/Siulittaasup tullia